

博野縣志序

州縣當古諸侯之國古者
列國皆有史官紀其國事
而不以史名書周禮所載
曰邦國之志曰四方之志
其見於左氏傳者援志尤

多繫以地則有周志鄭書
繫以人則有仲虺之志與
史佚之志他若晉乘楚檮
杌亦一國之典耳吾邱僞
撰乃妄加以史之名此無
識也春秋得聖人筆削遂

尊進於六經國事不基重
哉漢書別志於紀表列傳
文中子譏其記繁而志寡
至唐乃有十道志郡縣合
百國以成書是周官之遺
意也自兩宋迄今郡縣各

自為志是周志鄭書之遺
意也志閱時而必修勢也
然志以修而精亦或以修
而壞故非其人莫屬焉直
隸縣志若高陽之脩自孫
文正公其鄉先生也靈壽

之脩自陸清獻公其良有
司也是皆出自大賢之手
聞風而起者雖識或不足
學或不逮而奉前憲以爲
標準故近時新志往往度
越舊志爲其得古作志之

本旨也博野本漢蠡吾地
後漢分置博陵而其更名
博野者考舊唐書及文獻
通考皆指爲後魏之縣則
舊志謂東漢以改此名未
必是也又縣在宋有寧邊

軍永定軍之名顧乃合稱
永寧軍恐亦載筆之訛然
此稱名之互異代遠年湮
或有難以遽定焉者夫志
之作豈惟是悉其山川賦
役人文物產云爾哉令長

為親民之官民事不外富
教兩大端康熙壬午恭逢
我

聖祖仁皇帝春省畿甸

駕次博野舉

親耕之典而博野以保定一小

邑遂著望於寰區二程夫子之先世居博野者乃其五世以上而鄉人懷賢溯源建二程祠至今載在祀典則是邑之俗樸而風淳孝弟力田其觀感有所自

序五
矣我

朝百餘年來邑令既循良輩
出而邑人若尹少宰公設
義倉義田立義學皆原本
忠孝之意繼自今大化之
成我知其必蒸蒸益進於

古也茲縣志輯成其發凡
起例訂謬補遺則少宰之
子觀察君嘉銓實襄助之
其意在有裨政治而不涉
乎繁雜浮誕之詞昔孔子
稱志有之曰言以足志文

以是言是編其猶知不失
此意歟

乾隆三十有二年歲在丁
亥仲春之月

誥授光祿大夫 太子太保都
察院右都御史直隸總督

桐城方觀承書



凡例

一正名目縣之有志原備國史採擇分門別類當以廿二史爲宗方合義法舊志杜撰無稽今悉更正

一尚體要門類之分原爲便於省覽若太繁瑣反易混淆如博野本無山川亦少形勝何必多立條目卽民風物產要皆本乎地也悉入疆域之中以歸簡易至於政事學校秩祀古蹟中有附錄亦皆倣此

十里縣志
卷首
一斥淫祀淫祀無福載在禮經自爲儒術所必斥
陸清獻公修靈壽縣志悉行屏絕義例昭然故
雖以城內之雲巖寺枯柏榮分宋邨之靈光塔
建自盛唐千載流傳亦不闢入

一遠鄙倍諺語傳聞有益治理亦可附錄若如舊
志所載八景牽引不倫以及蠡邨之貨郎疙疸
杜家莊之桃園毆姪祥異好怪傳疑多誣徒惑
民聽今概從刪

一崇典禮舊志條列人物未免輕心掉之况名宦

鄉賢忠義節孝四祠出于特建何等優崇今卽敬用標名以昭鉅典

一揚善類史有儒林文苑卓行列女諸傳當代不過數人以小邑而頻書似屬冒濫不知天下之善士千里曠若比肩國士亦自無雙而忠信之人則十室必有學歸于善莫非同類今亦在鄉言鄉耳君子猶以爲少也

一徵文獻凡志皆載藝文而舊志屏置不錄是以千百年來荒畧無徵今從藏書石刻廣爲採輯

附以詩賦聊見大意比年文教日興篇章斯盛然無關風化者亦不濫載

一留餘地志書之有職官選舉固積日而更新其爲名宦鄉賢亦閱時而行立近則十年遠則必世見聞相接卽宜增修若連篇累牘則難補入今于各類之末卽爲斷簡以俟他年續纂庶幾無棄前功